

Liklik nius long

prea,

givim na go

EBC Wok Misin

NIUSLETA NO. 61 EPRIL 2017

DIA OL PREN BILONG WOK MISIN!

Mipela i amamas long salim dispela niusleta No. 61 long yupela ol kongrigesen. Yupela ol misin diken i ken makim sampela bratasusa long ritim ol ripot long taim bilong lotu long Sande long 30 Epril, 2017. Ofa long dispela Sande i go long sapatim wok misin. Tenkyu tru long prea bilong yupela ol bratasusa i harim ol dispela ripot.

Adres bilong salim mani:

EBC Overseas Mission
BSP Goroka Branch
No. 1000 751 861

OI Fild Adres:

Mike Kaire
EBC Community Service
P.O. Box 250, Dili, East Timor
Mobile: (00) 670 77757402
Email: mikekaire@ymail.com

Sifu Family

STT BMW Papua
Nabire 98802
HP: 0852-1357-0016/
0812-48620-831
Phone: (+628) 124 8620831
Email: bmwpapua@gmail.com

Liklik nius long EBC Wok Misin

Design & Printing by:
EBC Publications Department, Lae

WOK MISIN NIUSLETA EPRIL

Dia ol bratasusa,

Mipela i amamas tru long bringim ol sampela nius long wok misin long yupela.

God i save sanap long promis bilong en na em i save inapim tru olgeta tok bilong en. Sampela taim em i larim yumi wet longpela taim long lukim kaikai i kamap long wanpela gaden em i tokim yumi long wok long en.

Long las niusleta yumi lukim na harim sampela gutpela ripot i kamap long Is Timor na bel bilong yumi i amamas tru olsem wanpela hauslotu i kirap na ol planti manmeri i wok long i kam lotu. Na tu yumi harim wok i kamap long wanpela viles Baibel Skul bai i kamap. Yumi givim biknem long God long promis bilong en.

Olsem tasol Tok bilong mi bai i no inap kam bek nating long mi. Nogat. Em bai i mekim ol samting i kamap olsem mi tok. Na em bai i kamapim ol samting mi gat laik long ol i mas kamap. Aisaia 55:11

IS TIMOR

Long mun Disemba long las yia, brata Torsten Kugler wantaim Jenu, pikinini bilong brata Mike, tupela i go kamap long Timor. Jenu i kisim sampela taim wantaim papamama olsem sotpela holide bilong en na



Mike na Mangen wantaim kongrigesin



Timor Leste

Brata Torsten i go bilong mekim wanpela muvi piksa long wok misin i kirap long Is Timor. Mipela i amamas tru na tok tenkyu long Papa God long dispela dua i op long Brata Torsten i ken mekim wanpela gutpela muvi piksa long mipela i ken yusim long misin awenes. Em i wanpela gutpela risos stret long kirapim ol Kristen long lukim bikpela nid na hangre bilong gutnius long Is Timor.



Mike i toktok wantaim Papa graun, Paleo

Long Janueri, susa Mangen na Jenu i kam long PNG long kisim sotpela malolo na brata Mike i stap yet long Timor wantaim sampela wokman long stretim yet ples we Baibel Skul bai i kamap. Bihain brata Mike i joinim famili long PNG. Sotpela taim ol i kam stap long ples na ol i go bek long Is Timor.

Mipela i amamas na tenkyu long God long em i kirapim mama sios long salim wanpela voluntia tim i kam helpim long wokim ol haus bilong Baibel Skul long Is Timor.

Brata Daniel Gutmann i redi long bringim dispela tim i kam go long Timor. Mipela amamas Hetkomiti i makim tupela kapenta long EBCPNG em, brata Eninton Yauka long Kassam na Matyu Jon bilong Not Simbu long i go long Is Timor long wok bung wantaim voluntia tim long wokim haus bilong Baibel Skul.

Planti dua long autim gutnius i op long Is Timor na i gat bikpela nid long wok manmeri long bringim gutnius. Yumi beten na askim Papa bilong gaden long salim planti wok manmeri.

OPERESAN MOBILASESEN (OM)

Bikpela i wok long strongim Kawanda husat i kamap klostu long pinisim trening bilong en antap long solwara. Nau em bin aplai long skul long kisim intenesenel laisens long Australia na em i wet i stap. Yumi ken prea inap God i ken stiaim olgeta samting.

NABIRE - INDONESIA

Mi brata Sifu wantaim famili i tok bikpela tenkyu stret long olgeta prea na sapot bilong yupela wanwan. Bel na tingting bilong yupela i stap baksait long mipela famili long wok bilong Bikpela long hia na dispela i save givim mipela strong na amamas long wok.

Mipela i sori olsem longpela taim liklik mipela i no bin salim wanpela niusleta i kam inap nau mipela i salim. Maski hevi i stap tasol mipela tenkyu long marimari bilong God.

Long Baibel Skul hia (BMW), mitupela meri i wok olsem kaunsela



Nupela kitsen bilong misinari haus

na ol sumatin husat i gat hevi na wari i save i kam na mitupela i toktok na prea wantaim ol. Mitupela i save skulim Inglis na lukautim fam bilong skul.

Las yia long 2016, mipela i holim wanpela kem ol i kolim Boot Camp (Orientation). Em i nambawan taim susa Baba i kodinetim dispela kem. Bikpela i blesim na lukautim gut na i no gat wanpela bikpela hevi i kamap. Insait long dispela boot camp, 9-pela sumatin, man na meri i tanim bel. Mipela i bin yusim bel bilong man sat na autim tok long dispela.

Yajasan Misi Remaja International (YMRI) i makim mitupela long dispela grup "The Great Commission Team" bilong trenim ol misinari long go aut na inapim dispela tok i stap long Mak 16.15, Luk 24.14, Aposel 1.18. Mitupela i kisim dispela trening long Jakarta, biktaun bilong Indonesia.

Binosi i skul long tokples Bahasa Indonesia nau, em i inap long spikim dispela tokples. Baba tu i spikim Bahasa na tupela i stap tisa bilong mi na tanim tok bilong mi.

God i opim wanpela dua we susa Baba i kisim Sande Skul long wanpela sios.

Em tu i save tanim tok i go Bahasa taim mi autim. God i kisim biknem.

Tenkyu long olgeta prea, God i helpim na mipela i kisim wanpela yia visa na mipela bai i kisim gen (multiple entry).

PREA POIN

- Tenkyu long God opim kain kain dua long autim gutnius bilong en.
- Tenkyu long Baba na Binosi i kisim tokples Bahasa pinis na i save skulim brata Sifu gen.
- Prea long volentia tim i go long Is Timor inap God i ken strongim ol long wokim haus.
- Prea long God i ken putim paia long bel bilong ol sumatin long autim tok bilong en taim ol i pinis na go.
- Prea long God i ken helpim na lukautim Sifu long wanpela patrol em laik mekim long ol ples Dogiai, em hailens bilong Wes Papua.
- Prea long gutnius i ken i go insait long olgeta hap long Wes Papua.
- Prea long Sifu inap em i ken mekim tokples Bahasa gut.

Tenkyu long olgeta prea na sapot bilong yupela. Papa God i ken blesim yupela.

INLAN WOK MISIN

Tenkyu long God i harim prea na mipela i gat wok manmeri i stap pinis long rot long i go Manus na Samarai. Yumi laik tingim long prea long ol arapela wok misin ples insait long PNG: Buka, Gabadi, Kerema, Kaintiba, Tari, Lailam, boda bilong Sepik na Enga na long ples Wabo long Kerema sait, Green River long Wes Sepik, Vanimo na long Tabubil we ol i wok wantaim ol Wes Papua na sampela moa insait long ol bus ples.

Tenkyu tru long stap wantaim mipela long harim ol dispela nius na yumi i ken go on long prea na givim long wok bilong autim gutnius. God i blesim yupela olgeta.



Nupela moto baik bilong wok misin long Nabire